

Sarajevo, 11.12.2017. godine

Saopštenje za medije

Rekordan uspjeh SMART Resursnog centra: broj prijavljenih Satova kodiranja nadmašio očekivanja

U sedmici informatičke pismenosti u BiH organizovano više od 600 sati kodiranja, u Srbiji 122, u Makedoniji 27, a u Hrvatskoj 297

SMART Resursni centar, zvanični zastupnik najveće akcije učenja u svijetu, **Sat kodiranja**, u sedmici informatičke pismenosti od **4. do 10. decembra** je u saradnji sa partnerima, svim ministarstavima obrazovanja, stotinama škola, nastavnika i nastavnica organizovao više od **600 sati** kodiranja za osnovce i srednjoškolce. „Svake godine smo bilježili rast broja zainteresovanih škola za 25%. Ove godine je broj prijavljenih Satkova kodiranja nadmašio očekivanja.“ Kaže Dajana Cvjetković, menadžerica Smart Resursnog centra.

Tokom sedmice informatičke pismenosti mnogobrojne škole u BiH su organizovale Sat kodiranja za svoje učenike koristeći se tutorijalima kreiranim posebno za ovu akciju. Kreatori akcije okupljeni u internacionalnoj organizaciji Code.org smatraju da ovaj globalni pokret upoznaje milione učenika diljem svijeta sa informatikom na zanimljiv i participativan način, inspiriše djecu da uče više, prevazilaze stereotipe, i što je najvažnije akcija ih ohrabruje da se odvaži i izaberu programiranje za svoj profesionalni poziv.

SMART Resursni centar, slijedeći globalnu viziju, u svojim prostorijama je gostio 88 osnovaca iz OŠ Kovačići, OŠ Pofalići, OŠ Osman Nakaš, OŠ Čengić Vila 1, OŠ Grbavica 1 i OŠ Hamza Humo koji su radeći i razgovarajući sa uposlenicima HUB-a 387 dobili jasniju sliku šta znači biti programer u BiH. Domaćin sata kodiranja je bila i IT Academy-a koja je 100 srednjoškolaca iz Gimnazije Banja Luka, Gimnazije Dobrinja, Srednje elektrotehničke škole za energetiku, Srednje zubotehničke škole, Srednje građevinsko – geodetske i Srednje ugostiteljsko – turističke škole ugostila u svojim prostorijama u Sarajevu i Banja Luci, a najuspješnije nagradila besplatnom edukacijom, kurs HTML i CSS u trajanju od dva mjeseca kako bi nastavili svoje učenje o programiranju. Osim u školskom okruženju, Sat kodiranja je predstavljen svim zainteresovanim za obrazovanje tokom Sajma obrazovanja u Domu Mladih, u petak 8.12.2017.

Završni, a ujedno i najveći, edukacijski događaj organizovan je na Elektrotehničkom fakultetu u Sarajevu u subotu 9.12.2017. za 84 srednjoškolca iz Prve gimnazije, Srednje mašinsko – tehničke škole, Gimnazije Visoko i Srednje tehničke škole, grafičkih tehnologija, dizajna i multimedije. Napredni sat kodiranja su vodili studenti i profesori fakulteta, u 5 odvojenih laboratorija nakon čega je upriličen obilazak fakulteta, predstavljanje sadržaja kurikuluma ali i perspektivana informatičke naobrazbe.

Zvanični podaci o broju učenika uključenih u Sat kodiranja biće objavljeni u martu 2018. godine.

Srdačan pozdrav,

Dajana Cvjetković, menadžerica SMART Resursnog centra

Partneri na projektu:



LINKgroup

by LINKgroup
ITAcademy™
Škola za profitabilnu IT karijeru

Coca-Cola
Hellenic Bottling Company

 **Microsoft** 